



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Baucau
22 Abril 2014

**Tribunál Distritál Baucau kondena pena prizaun tinan 12 ba arguidu kazu abuzu seksuál
ba menór**

Iha 16 Abril 2015, Tribunál Distritál Baucau prezide leitura akordaun ba kazu abuzu seksuál ba menór no kondena arguidu ho inisiál O, ho pena tinan 12 iha prizaun. Tribunál prova katak arguidu ne'ebé maisumenus tinan 63 ona komete krime abuzu seksuál ba menór ho tinan 10 iha Distritu Baucau.

Tribunál prova katak iha 17 Marsu 2013, oras 12:00 meudia, lezada ba foti tua mutin iha arguidu nia uma iha natar. Wainhira atu fila arguidu kaer no komete krime abuzu seksuál hasoru lezada.

Faktu hirak ne'e reforsa liu-tan hosi testemuña AdC (*lezada nia bin*) ne'ebé iha momentu ne'ebá hare ho matan akontesimentu ne'e no lori kedas lezada ba iha polísia VPU. Iha momentu ne'ebá arguidu tenta fo osan ba testemuña atu la bele konta sai ba ema relasiona ho akontesimentu ne'e. Aktu ne'e kauza lezada senti moe no para eskola to'o agora.

“JSMP enkoraza komponente estadu tomak atu konsidera katak aktu seksuál hasoru labarik nu'udar krime ne'ebé grave teb-tebes no kauza sofrimentu psikolojiku no dezemvolvimentu labarik sira nian ba tempu naruk. Tanba ne'e husu ba ema hotu atu luta hasoru krime ne'e, dehan Diretór Ezekutivu JSMP, Luis de Oliveira Sampaio.

Antes ne'e, durante inisiu tinan 2015 to'o mai Abril nia klaran 2015, JSMP rejista ona kazu krime abuzu seksuál ba menór 4 seluk ne'ebé tribunál kondena ona arguidu sira. Kazu primeriu, Tribunál Distritál Suai kondena arguidu ho pena tinan 14 ne'ebé komete abuzu seksuál hasoru lezada ho idade 13, kazu segundu Tribunál Distritál Baucau (TDB) kondena arguidu ho pena prizaun tinan 15 tanba komete krime abuzu seksuál (inestu) hasoru lezada ho idade tinan 10, kazu terseiru TDB mós kondena arguidu ho pena tinan 17 tanba provadu komete krime hasoru lezada ne'ebé sei ho idade tinan 10 no kazu kuartu Tribunál Distritál Dili kondena arguidu ho pena prizaun tinan 20 tanba arguidu provadu komete krime hasoru lezada ne'ebé foin tinan 6. Aleinde kondena arguidu ho pena prizaun, iha kazu segundu ne'e, tribunál mós kodena arguidu selu indemnizasaun sivíl US\$2,000.00 ba lezada.

Dalabarak ona, JSMP rekomenda ba tribunál sira atu aleinde kondena arguidu sira ho pena prizaun, tribunál mós tenki kondena arguidu sira atu selu indemnizasaun ba vítima sira atu rekoñese vítima nia sofrimentu todan ne'ebé sira infrenta.

JSMP fiar katak abuzu seksuál hasoru labarik fo impaktu negativu no sériu teb-tebes ba labarik sira nia dezenvolvimentu sosial no psikolójiku. Hanesan iha kazu ne'e, vítima senti moe no deside atu para nia eskola. Ne'e prova ida katak konsekuensia ne'ebé vítima sira sofre sériu tebes.

Tanba ne'e JSMP kontinua enkoraza entidades hotu-hotu tenki konsidera katak aktu seksuál hasoru labarik nu'udar krime ne'ebé grave teb-tebes no kauza sofrimentu psikolójiku no dezenvolvimentu labarik sira nian ba tempu naruk.

Kazu ne'e rejista iha tribunál ho Núc. 0140/13. PDBAU, julgamentu leitura akordaun prezide hosi representante juis kolektivu Dra. Afonso Carmona, Ministériu Públiku representa hosi Dr. Luis H. Rangel da Cruz no arguidu hetan akompañamentu hosi Dr. Mario Fernandes hosi Advogadau Comisaun Justisa no Paz Diocese Baucau.

Atu hetan tan informasaun, favór ida kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org